



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7 Yangia anidakangma : Tir Yimym tir_yimym

tir yimym **TAPAK 8**

Tashi tulu linük temia tembar
nüngdaker: Israel PM Netanyahu

Uzbekistan coach Fabio
Cannavaro kumogo

VOL. XXII ISSUE NO. 353 (ADOK 353) DIMAPUR RASEMNÜ (WEDNESDAY) MONGPUTENI (OCTOBER) 08, 2025 ₹ 5.00

NE nung Universal Health Coverage asenoki inyaktettsü: T.R. Zeliang

Dimapur, Mongputeni/Oct. 07 (TYO): Deputy Chief Minister aser Minister, Planning & Transformation and National Highway, T.R. Zeliang-i Zone Niathu, Chümoukedima nung "Health financing forum for cross-state learning in the Northeast region" sentong Monglubarü tenzütsü.

Iba anogo ana sentong ya Department of Health and Family Welfare, Nagaland ajanga The World Bank den lungjemer ayongzüba lir.

Iba sentong nung jembidang, iba workshop ya item tajangshiba aser tangazükba tem kati ka nungi angazütsü asoshi lir, ta Zeliang-i ashi.

Health financing aser service delivery tajungba kumdaktsütsü asoshi Northeast nung aliba state shia lenmang balala nung jajar. Kari insurance coverage aser equity nung rangloker, kari ochishia aser junga inyakba nung rangloker, aser kari ketdangsüba aser public financial systems nung rangloker, ta ashi.

Cross-state learning ajanga asenoki yimya tasen angazükba mapang tatsüba kumdaktsür, ibaji ajanga nisung kati inyakba aser



T.R. Zeliang

ajangshibatem arok terenlok kumdaktsür. Ano iba yagi region telungzük nung kisüng masü saka India aser alima tesem ajunga nung inyaktettsü aser asadangtettsü akokba models tem jangjaba nung yarir, ta pai ashi.

Iba workshop ya project cycle ka tatembang masü saka data, kuli aser sensaksemba ajanga policy yangluba nung phase tasen ka tenzüker, ta Deputy CM-i ashi.

Northeast nung Universal Health Coverage (UHC) indang lenmang ya talang asütsü akok, saka asenok kati ka dak nungi maneni angazüka system nung temulung agüja inyakra asenoki tongtettsü, ta paisa ashi.

NHIDCL-i NH-29 project nung state-i ashi manga: Dy. CM

Dimapur, Mongputeni/Oct. 07 (TYO): Chümoukedima aser Kohima tsüngta National Highway-29 yangluba aser anepaluba nung state sorkari tongtipang teinyaktsü kar ashiba National Highways and Infrastructure Development Corporation Limited (NHIDCL) ajanga meinyak, ta Nagaland Deputy Chief Minister, TR Zeliang-i Monglubarü ashi, kong meyi mapang alinen aser lishi anenzüka aluba ajanga maneni kongshir.

Zone Niathu by The Park, Chümoukedima nung sentong ka aliba sülen osangbener den jembidang, NHIDCL-i akok tashi tajungtiba nung inyaktsü meranger, saka state-i shisa bilemba lemsatepba ama inuak asübo teraksa ya paidoker lila, ta Zeliang-i ashi.

State sorkari NHIDCL dang ali metenzüka aoba nungi nokdangtsü asoshi tzü telung len feet 40 nungi 50 shi nung piling walls ama 'protective structures' yanglutsü shisa agütsü. "Iba piling ya inyak asübo, teraksa ya majurui paidoker lila," ta pai ashi.

Ano retaining wall nung indang-indanga oa kongshiba tzü nokdangtsü asoshi ayong sür külen tenem tila anzüktsü proposal agütsü. Ajisüaka NHIDCL-i iba ya meshisadang, aser iba yongji iba ama tebilemtsü tang maneni ajuru, ta pai ashi aser ano alimar yimya

ajanga iba tensa ya bener arutsür, koba jungunga menokdangtettsü ta shisem.

State sorkari Niuland nungi Chisema tashi temelen lenmang tongti ka yanglutsü meranger aser iba ya 2026 küm March mesüra April tashinung renema amshitsü imlar, ta pai metetdaktsü.

NH-29 yanglutsü asoshi sentong yangluba mapang 2014 küm Ministry of Road Transport and Highways (MoRTH) nungi Chief Engineer-i semdang dang state sorkari ayong anatsülen two-lane lenmang ana yanglutsü shidanga liasü. Iba design yagi two-lane ana külemi alitsü aser akokba tesem nung ajurutepa four-lane highway akumtsü liasü, ta pai ashi.

Iba den ano lenmang ka raksa dang ka amshitsü atema tenem tsütsü two-lane lenmang ka yanglutsü asüngdang, saka NHIDCL-i iba project agizükba sülen par mulungba nung inyak tenzük. Aser yamaji tetenzük nungi aibelen liasü, ta ashi.

Chümoukedima anasa tanen makai lenmang raksaba mechi state sorkari indang-indanga teka amuoktsü asü ta asüngdang dang, sorkari teti NHIDCL aser agency balala den osangtsüsang agitepa arur, ta Zeliang-i langzü.

"Mapang shia shisa lemsatepba senden amener, saka onoki ashiba sülen parnoki manidaker. Aser aibelenji aji lir," ta paisa ashi.

Non-Naga Tribes atema police recruitment mapa soita atar

Dimapur, Mongputeni/Oct. 07 (TYO): Nagaland sorkari Non-Naga Tribes pezü - Garos, Kacharis, Mikirs (Karbis) aser Kukis - asoshi police constable posts lemozükja aliba atema recruitment process ya item kin ya State nung Indigenous Inhabitants ta jangjatsü asoshi Enumeration Exercise agiba merenem tashi soita atar.

Home Department ajanga ashiba agi, Constitution (Nagaland) Scheduled Tribes Order, 1970 nung Naga kin tem dak alia item Non-Naga communities pezü ya Scheduled Tribes of Nagaland ta agizüka lir saka parnok State nung alir asütsüla. Iba totuyuba nungya December 1, 1963 nung Nagaland state mekumtetdang nungi item kin ya state nung aliba indanga shia lir.

Non-Naga Tribes pezü indang züngsem aser parnok dak nungi indang-indanga jakzüker tem scheduled Tribe (ST) certificates meshitsü langa lir aser iba sülen Indigenous Inhabitant

Certificates (IIC) meshitettsü, koba ajanga Indigenous Inhabitants of Nagaland asoshi aliba employment aser danga maongka tem agitsü melar. Ajisüaka iba 'entitlement' ya State arütsü telungzük nung state mekumtetdang nungi arua alirtem atema kisüng lir.

Item kin ya danga North Eastern States (aika Nagaland den arütsüa lir) tem nunga alir asünung, Statehood sülen Nagaland bushia aruba alitsü akok, ta Home Department ajanga ashi.

Nisung kar nem meshidaki ST aser IIC certificates agüja alitsü akok, anungji 1963 masüadang State nung arua alir tejangja jangjatettsü nüngdaker.

Ibaji bentettsü atema sorkari RIIN Commission ajanga ngutetba asadanga shisa agitepba sülen December 1, 1963 masüadang Nagaland nung arua aliba Kuki, Kachari, Garo aser Mikhir kin asoshi Enumeration Exercise agitsü telemtetba agi.

Iba telemtetba ya Home

Department ajanga September 20, 2024 nü metetdaktsü. Ajisüaka iba sülen Non-Naga Tribes pezü nungi lokti tentet temi Gauhati High Court nung writ petition ka benok. Aser ken o sub judice nung alinung, Enumeration Exercise agiba anena atatsü totuyuba agütsü.

IICs aser danga temeden, talisa State sorkar nung mapa bushitsü asoshi temsüa aliba Non-Naga Tribes pezü nungi tejangja Indigenous Inhabitants jangjatsü asoshi iba exercise ya kanga tongtipang lir, ta Department ajanga ashi.

Ken o metembangi lir asünung, Indigenous Inhabitants of Nagaland ajak asoshi police constable recruitment tang tenzüka aliba ya Indigenous Naga Tribes nem lemozükja aliba posts 1,176 atema dang agitsü. Non-Naga Tribes pezü atema posts 24 wazüka yuja aliba ya Enumeration dak sendakba ken o bentetba sülen shimtsü, ta Home Department sangdong ajanga ashi.

Mokokchung Police-i tatidang agütsütsü jangrartem atema 'Help Desk' lapoker

Mokokchung, 07 Oct (TYO): Nagaland Police constables tatidang agitsü atema tang koba online ajanga maparen inyakdar, iba dak sentakba nung Mokokchung Police-i nüngdakbapur yaritsü asoshi Mokokchung district kübok tesem balala nung 'Help Desk' lapoktsü, ta Mokokchung Sr. Superintendent of Police, Vesupra Kezo NPS-i sangdong ka nung metetdaktsüogo.

Mokokchung town nung Help Desk-ji - Süngkomen Ward, Traffic Point aser Deputy Commissioner office Junction (Penli Ward)-tem nung 8th & 9th October, 2025 anogotem nung

lapoka amentsü. Kasa Help Desk ji Tuli Police Station aser Changtongya Town nunga 10th October, 2025 nü anepdang 10:00 AM ako nungi tenzüka amentsü.

Help Desk nung amenertemi online ajanga form fill up asüba maparen den ano tanga nüngdakbatem nung yariteptsü. Nüngdakbapurtemi item help desk nung arua iba teyari agitsü mepishir. Tejangrartemi item nüngdakba kaketterem - tawa tangokba noksa passport size (white background nung), Aadhaar Card/Pan Card/Driving License, tazungba certificate class 8 mesüra tema (class 8 and above), talila certificates kar lira

(Sports/NCC etc), Indigenous/ ST Certificate, Date of Birth proof - Birth Certificate/Matriculation mesüra Admit Card, Government Servant-tem atema No Objection Certificate (NOC), itemji original mesüra soft copy nung bener arutsü mepishir, ta Mokokchung Sr. SP-isa metetdaktsü.

Iba dak sentakba nung osang tejangja aginürtem iba number - 9366686220/8837081752 nung tongteprateptsü mepishir. Tejangrar aser temsüa alirtemi Nagaland police constable tatidang atema timtem meli-i application agütsütettsüsa ajaki iba teyari agitsü ajungshir ta kasa sangdong nungsa metetdaktsü.

Kohima nung chiyongtsü amshiyim shidak maliba putet

Kohima, Mongputeni/Oct. 07 (TYO): District nung chiyongtsü meraksai kumzüka ayutsü aser amshitsü asoshi mera agiba asadangtsü atema District Level Advisory Committee (DLAC) on Safe Food & Healthy Diets senden ka October 7, 2025 nü Deputy Commissioner, Kohima indang Conference Hall nung senden ka mena liasü.

Iba senden nung Task Force Team pongui Kohima district kübok tesem balala parnoki semdanga jajaba indang osang PowerPoint agüja liasü. Inspection shilem mezügbuba takok ngua tembangba asoshi Deputy Commissioner ajanga parnok nem tenügsang agüja

liasü.

Item Task Force Team temi anogo pongu tsüngta hotels 31 aser restaurants 77 densema establishments 108 semdanga liasü. Parnoki FSSAI licenses mesüra registrations indang validity jangjatsü nungrangloker sema jaja aser Food Safety and Standards Act, 2006 den shidak anidaker asü masü ta repranga liasü.

Iba mapang parnoki chiyongtsü mapang liwar aliba, junga rizünga mayuba, mesen azüoktsü mera abensaa magiba aser jana ketdangsüba nung metokmeperi aliba, sorochoikdak tesemtem memürekba, vegetarian aser non-vegetarian

chiyongtsü bensaa mayuba, atem memürekba aser chiyongtsü nembangba nung osangkaket amshiba amala tebilemtsü jangjatet.

Establishments aika nung mapa inyaker atema medical fitness certificate aser water quality reports maliba nguteta liasü. Chiyongtsü achiba tesembo müreka liasü saka sorochoikdak tesem timba senzüka yutsüba parnoki jangjatet.

Iba inspections senzüba sülen establishments 18 nem 'improvement notices' agütsütsü lir aser ka shibangtsüogo, ta parnoki report agütsüba nung shia liasü.

Tuensang nung Child Rights & Child protection awareness sentong agi



Dimapur, Mongputeni/October 7 (TYO): Nagaland State Commission for Protection of Child Rights (NSCPCR) aser District Child protection Unit, Tuensang na longjemmer October 7 nü Chang Khuli Setshang Hall, Tuensang nung Child Rights & Child protection dak sendakba nung awareness sentong ka agiogo.

Sentong nung o jembiba mapang Tuensang Deputy Commissioner Lithrongla Tongpi Rutsa, NCS-i, tanurtem temeden aser parnok kümzüka toktsütsüba dak sendakba nung sentepa aliba lokti ajungshi aser ashiba agi, tanur ajak ya kanga senti aser parnok kümzüka ayutsü aser lenla ajak nung tebandang makai aser mezüing meshi mesüi parnok anepalua intetdaksütsüji ajak khuret lir.

Kibok nung tanurtem züka merenshia amshiba tema matokba ya lokti ajak nung lir aser iba ya takaratiba nung raktoktsüla, ta lai ashi. Rutsa-isa, yimsü yimbotem, lokti lenirtem, NGO tem, kaketshir lokti tentet balala aser tsürapurtem dang tanurtem temeden aser tanurtem kümzüka toktsütsü atema tetuyuba agütsür aliba sülen tashi anga anidaksü mepeshia metetdaksüogo. Laisa, iba awareness sentong nung shilem agiba atema sentong nung shilem agir ajak dang kanga pelaba lemsatepa liasü.

Sentong nung shisalen sayurtemji Legal Consultant NSCPCR, Lichani Murry, Member NSCPCR, Akumla Longchari aser Member NSCPCR, Aying Wangsha nung liasü aser parnoki

Adoption Rules dak rangloker Juvenile Justice Act, tanurtem tarutsü tajungba ka asoshi POCSO Act angatettsü aser tashi itshidaksütsü aser Right to Education dak sendakba nung tanurtem temeden aser Child Labour amala onüktem dak rangloker jembia liasü.

Iba sentong ya Project Coordinator, Hongen Thangty Chang lenisüba nung agi aser Secretary Social Welfare and Secretary NSCPCR, Yongchingkumla, NCS-ia o tatsüka jembia liasü.

District nung tanur dak sendakba ken o indang osang tatsüka DCPO Tuensang, Yangtriba Sangtam-i agütsü. Maneni sentong nung shilem agirtem den Child Rights aser Child protection dak sendakba nung sensaksem aka.

Tuensang DPDB senden menogo

Dimapur, Mongputeni/October 7 (TYO): Tuensang District Planning & Development Board senden October 7 nü Deputy Commissioner & DPDB Vice Chairman, Tuensang, Lithrongla Tongpi Rutsa, NCS lenisüba nung menogo.

Senden nung house-i Hak Village Development Society, Rural Farmers Society aser Yangpi Nukenloba Mission Society züngoksemsü atema sorkar dangi abentsü telemtetba agia liasü.

DC Tuensang-isa, Tuensang lenmang kanga mejungi akümba indang züngsemtem nem metetdaksü aser line Department tem dang takaratiba nung yanglushitsü mepeshia liasü. DC-isa, inyakyim balala ajanga district nung aliba nüburtem nem teyari

agütsüba asoshi Sao Chang College Principal aser Water Resource Department dang kanga pelaba lemsatep.

Senden nung Principal Sao Chang College Tuensang aser Water Resource Department Tuensang nati PowerPoint presentation agüja liasü.

ATMA Tuensang-ia, HOD aser line Department ajak dang plan 2025 atema teka amteper inyaksü mepeshia liasü.

Maneni DC Tuensang-i, state nung best performing District naroküm anguba atema ATMA Tuensang nem tenüngsang agütsü. Kasa mapang nung ETC (SIRD) Principal-a DPDB Tuensang nung züngsem ka ama züngoksemogo.

Kasa mapang nung Tuensang DC-i sangdong ka

ajanga tsürapu ajak dang UDISE nung kaketshirtem ajak APAAR ID (Automated Permanent Academic Account Registry) aser PEN (Permanent Education Number) generate asütsü atema Aadhaar ya mandatory kuli kaket ka kümogo ta metetdaksü.

Anungji iba dak sendakba nung Aadhaar nung mezüngoksem aliba tanur tsürapur ajak dang tetsükdaksü balala nungi jenbotsü atema tanurtem Aadhaar nung takaratiba nung züngoksemsü DC-isa metetdaksü.

Maneni Tuensang DC Lithrongla-i, two-wheeler taxi permits agütsütsü atema shimer aliba candidate tem October 8 nü DC Office-i 1 ako nungi interview atema arutsü metetdaksüogo.

Niuland DC-i Hovukhu Solar Power Plant indang metetdaksü

Dimapur, Mongputeni/October 7 (TYO): Niuland nung 2x5 MW Hovukhu Solar Power Plant nung jenjang tasak voltage electrical equipment tem amenoka lir, koba kongshira lendong tulu ataloktsü aser tzünglu aruba mapang aser tzüsü longa aliba mapang mopung ajanga transmit asütsü ana nung lir. Ano DC office nung amenoka aliba Solar Power Plants koba leaka süra kanga lendong lir, item plant tem nung taküm samaba nungi jenboa alitsü atema atakzükja aliba ama security atsü atsüja lir.

Kasa mapang nung Solar Power Plants tem yagi tzüngi kanga atsür anungji iba dak sendakba nung atsü aser vital high voltage equipments tem

nung tekümdaksü metetdakja lir.

Ajisüaka atsü atsüa toktsüba den tekümdangtsü osang agütsür liaka nüburtemi temelaba makai item plant tem semdang, koba nisung taküm atema kanga lendong aser nüburtemi plant nung amenoka aliba sensitive equipment tem raksatsütsü akok.

Anungji nüburtem kümzüka toktsütsü atema Niuland, Nagaland nung amenoka aliba 2x5 MW Hovukhu Solar Power Plant ya nüburtem atema restricted area ka ta sangdongogo aser tashi mangartem BNS kübok Section 223 aser temzüng ozüing kübok tanga tapet section tem dak ajemdaker merenshitsü, ta DC-i metetdaksüogo.

Medziphema nung self-defence orientation agi

Dimapur, Mongputeni/October 7 (TYO): Samagra Shiksha, Educational Block Resource Centre, Medziphema, aser Nari Shakti Self Defence Club, GHS Naga United Village na longjemmer October 7 nü GHSS Medziphema auditorium nung anogo ka atema self-defence dak sendakba nung orientation sentong ka agiogo.

EBRC Medziphema block kübok GMS, GHS, aser GHSS 33 nungi school 27-i iba setong nung shilem agia liasü.

Okila jembiba mapang club ngutetsang aser instructor Pekinto Y. Jimo-i, sorkar school nung azüngba tetsürtem self-defence ajanga parnok sasadak temulung lemteta kümdaksütsü aser tashi itshidaksütsü asoshi pa tejangraba aliba lemsatep.

Pai ashiba agi, Nari Shakti Self-Defence programme ajanga club-i, ajaki amshitetba tasa kar sorkar school nung tetsür kaketshirtem nem agütsütsü asoshi yongya atar.

Self-defence ya koda tongtibang indang jembiba mapang Head Coach, Strike Fit Academy Kru Hemavi Aye-i, self-defence ya kar dak

tsüngoktsüba aser metsüoktsüba mesüra meyiper raraba ka masü saka chichiba self-defense-i pei sasa aziükba, tasü aitba aser pei temeden jembitsü tasü aitba nungi tenzüker, ta ashi

Tetsürtemi kodang tashi ita nokdaksü aser jembitsü angazükdir idangji tetsür ajaki peisasa pei kümzüka yutettsü, ta Hemavi-i ashi, shiba Nagaland State Muaythai Coach aser taoba National Coach, Indian Muaythai Team lir. Tetsürtem ya tashi maitba agi masü saka ajema ajema aliba ajanga victim akümer, pei ola amshia, teyari meshiba, osang agütsüba aser tasü ita jembiba ajanga taküm kümzüktettsü aser parnok amakertem nokdangtettsü, ta paisa shisem.

Sentong nung Team Strike-Fit Academy, Nagaland-i practical demonstration session ayongzüka agi.

Sentong ya Megophilie Noel, ToT lenisüba nung agi aser Coordinator EBRC Medziphema Menguseu Sote-i lokti pela agizükba o jembia liasü. Sentong ya Alem Jamir, ToT-i tepela o jembir tembanga liasü.

ITI Mon nung 4buba Skill Convocation sentong agiogo

Dimapur, Mongputeni/October 7 (TYO): Industrial Training Institute (ITI) atema National Scheme amenokba, Skilling & Kaushal Deekshant Samaroh atema National Centre of excellence amenokba asoshi 4buba Skill Convocation sentong October 4 nü Government ITI, Mon Exam Hall nung agiogo.

Sentong nung ITI Certificate tem Er. N. Nyaksham Phom, Principal ITI Mon-i lemja liasü. NCVET aser SCVT Trade kübok Skill certified candidates 64 lir. Sentong nungsa trade shia nung highest aggregate mark angur parnok pongu nem Certificate of Merit den senpet agüja liasü.

Maneni sentong nung Bomotakum-i, Trainees tem dang parnok skill tem takokba tashi tajungtiba nung amshitsü ajungshia liasü. Tang training agia alirtem tenüng nung Mechanic Motor Vehicle nungi C. Manwin Konyak-i senior tem nem parnok takok asoshi tenüngsang agütsü aser tangzükbatem benshia aoba mapang bendanga agüja inyaksü ajungshi.

Training toktsürtem tenüng Manjoi Phom Electrician-i o tatsüka jembia liasü. Vocational Instructor Electrician Nokyok Konyak-i lenisüba nung iba sentong agi aser lokti sarasadem ka agir tembanga liasü.

Peren nung Anemia Screening awareness sentong agi



Dimapur, Mongputeni/October 7 (TYO): Tainlonglong aiür chanutem atema October 7 nü Peren district kübok Inbung yimsüing nung Anemia screening aser awareness sentong ka agiogo.

District programme

Officer I. Tsungrosangla Ao-i ashiba agi, health and family welfare department den longjemmer social welfare department-i tainlonglong aiür chanutem atema Anemia Screening aser awareness sentong ayongzüka agiogo.

Sentong nung o jembiba

mapang Dr. Shebo khing (MO)-i menstrual hygiene koda tongtibang iba indang lemsatep, aser tainlonglong aiür chanutem health kanga junga anepalutsütsü atema lokti-i iba ken o ya tajungba angatettsü merangtsü ayongzüka liasü.



October 07, 2025 nü New Delhi 'Opportunities in Defence Manufacturing in the Country' conference nung Defence Minister, Rajnath Singh adenba noksa nung angur. Kasa noksa nung Air Chief Marshal Amar Preet Singh, Defense Staff Chief Anil Chauhan, Army Staff Chief Upendra Dwivedi aser Naval Staff Chief Dinesh Tripathi nungera angur.

Prashant Kishor-i tang mezüנג election nung tokteptsü

New Delhi, Mongputeni/ October 07 (Agencies): Bihar nung assembly menden 243 atema election agitsü lia election asalentong yanglur mongin, Prashant Kishor-i pai taruba election nung tokteptsü, ta sangdongogo.

October 9 nü Kishor-i aniba party Jan Suraaj-i candidate tem tenüנג sangdongtsü.

Hombarnü osangbenertem senden ka nung Chief Election Commissioner Gyanesh Kumar-i, Bihar nung November 6 aser November 11 anogotem nung assembly election agitsü aser November 14 nü vote azüנגtsü, ta sangdongogo.

Mongolbarnü osangbenertem den jembidang Kishor-i, "Ozü party-i taruba assembly election atema October 9 nü party candidate tem tenüנג sangdongtsü. Taruba election nung ni-a tokteptsü," ta

metetdaksü. Pai tang mezüנג election nung tokteptsü.

Bihar election atema Jan Suraaj party jenjang koma lir?, ta asüנגdangba langzüdang pai, "Taoba election nung teloktep anati voters shilem 72 indang vote ngua liasü. Tanüנגba vote shilem 28 ji onoki angutsü. Iba dak alia Suraaj Party-i teloktep anaprongla indang votes shilem 10 angutsü ta nüburtemi ashir. Iba tetezü onoki taruba election nung vote shilem 48 angutsü imlar," ta metetdaksü.

Paisa, Jan Suraaj-i NDA teloktep aser INDIA teloktep indang vote shilem aika angutsü, ta nüburtemi bilemer, ta metetdaksü.

Bihar chief minister Nitish Kumar aija Kishor-i, "Nitish Kumar atema taruba election ya tatembangbuba asütsü, ta ni züנגbong ashir. Pai taruba 'Makar Sankranti' (January

2026) ji state yimtiba nung Bihar Chief Minister official kidang, 1 Anne Marg nung mamongtsü," ta ashi.

Tan election ya Bihar yimtenren nung otsü tasen ka tenzüker asütsü, kechiyong nüburtemi pei chirnurtem atema, tangaleni oa mapa bushia aliba aser mapa manguba tebilemtsü anema vote agütsütsü, ta paisa metetdaksü.

Taruba Bihar election nung BJP-i aniba NDA teloktep, RJD-i aniba INDIA teloktep aser Jan Suraaj tsüנגda atongtepa tokteptsü imlar. NDA teloktep nungji Lok Janshakti Party (Ram Vilas), Hindustan Awami Morcha aser Rashtriya Lok Shakti Party densema lir aser INDIA teloktep nungji Congress, CPI(ML), CPI, CPM aser Vikasheel Insaan Party densema lir.

Kerala nung tanurtem nem doctor-i zülutsüba mozü dang agütsütsü

New Delhi, October 07 (Agencies): Tawa Madhya Pradesh aser Rajasthan na nung tanurtem nem aket mozü jemdaksüba sülen tanur aika asüba dak sendakba nung Kerala health minister, Veena George-i, state nung arrshi küm 12 ser tekübok tanurtem nem doctor-i zülubaba mozü dang chidaksütsüla, ta metetdaksüogo.

Tanurtem nem aket mozü jemdaksüba dak sendakba nung temzüנג-özüנג renemtsü atema Health Minister-i züנגsem aseme akümba committee ka tentetogo. Committee nung züנגsem asemji state drugs controller, child health nodal officer aser Indian Academy of Paediatrics nung Kerala Tir nunger lir.

"Tamalen doctor temi zülutsüba mozü-a alia tanurtem nem magütsütsüla. Tanurtem

temang touzüк nung ajemdaker ang tanur nem mozü telatet agütsür. Tanur ajakji kasa masü, anungji tanur ka nem mozü telatet zülutsübaji tangar tanur ka atemabo majung asütsü. Ni drugs controller dang Kerala nunga 'Coldrif' ta ajaba aket mozü ajemba agi tanur asüba tatalokba lir asü maliar bushisüנגdangang ta tuyuogo," ta lai metetdaksü.

Tongti ketdangsertem senden amenba sülen osangbenertem den jembidang health minister-i, Kerala nungbo Coldrif mozü ajemba agi tanur asüba osang mali, ta metetdaksü.

Laisa drugs controller dang tanurtem nem mozü agütsüba dak sendakba nung tsüraburtem nem aser nübur ajak nem angatetdaksütsü atema awareness campaigns agiang, ta tuyu.

States aser UTs tenet nung menden 8 atema by election agitsü

New Delhi, October 07 (Agencies): States aser Union Territories tenet nung menden 8 atema by election November 11 nü agitsü aser November 14 nü vote azüנגtsü.

Jammu & Kashmir kübok Budgam aser Nagrota menden, Rajasthan kübok Anta, Jharkhand kübok Ghatsila, Telangana kübok Jubilee Hills, Punjab kübok Tarn Taran,

Mizoram kübok Dampa aser Odisha kübok Nuapada assembly menden atema election agitsü.

Election Commission-isa Bihar nung assembly elections shilem ana lemsar agitsü metetdaksüogo. November 6 nü assembly menden 121 aser November 11 nü menden 122 atema election agitsü aser November 14 nü vote azüנגtsü.

Congress-i Tejashwi Yadav Chief Minister candidate mesüdaksünér

New Delhi, October 07 (Agencies): Mongolbarnü Congress lenir, Udit Raj-i, Bihar nung opposition lenir Tejashwi Yadav ya INDIA teloktep nungi chief minister candidate masü; CM candidate ji ajaki longjemer shimtsü, ta metetdaksü.

"RJD atemabo Tejashwi Yadav ji Chief Minister candidate asütsüa akok, ajisüaka INDIA teloktep atema CM candidate ji ajaki senteper shimtsü," ta pai ashi.

Hombarnü Tejashwi Yadav-i X ajanga, "Bihar nung nüburtemi temelenshi aginer. Tangbo parnoki Mahagathbandhan teloktep sorkar aginer. Mahagathbandhan-i sorkar akümtsü. Kodang Tejashwi CM kümdir Bihar nung kibong shia nung mapa manguba lanurtem November 14 anogoji puti otsü malitsü. Kodang Tejashwi nung züנגoktsü," ta arudair pai ajak nem mapa

agütsütsü. Bihar nungi mapa manguba tebilemtsü agentsü. Tanü benjung ka tenzüker," ta metetdakja liasü.

Hombarnü EC-i election agitsü anogotem sangdongba sülen Tejashwi-i, "Tangbo Bihari nunger ajak CM asütsü, parnok CM asütsü, temelenshi adokdaksürtem asütsü," ta metetdakja liasü.

Bihar CM Nitish Kumar aija Tejashwi-i, "Küm 20 tashi parnoki state nem özüנג alema inyakba aser ochimashi agütsüogo. Tangbo Bihar nung nüburtemi laaktetogo. CM tekolok meshidak. Temepishiba agütsür CM ka onoki maginer saka molusongzü ama arrba CM ka aginer. Bihari nunger temeden aser ochi temeden atema rarar ka aginer. November 14 anogoji puti otsü nung züנגoktsü," ta metetdaksü.

SANGDONGER

Asür Jepdakyangba (Longpa) kinungtsü Meyipokla aser par chirtem ajanga aruba ken o mesüra sentsühlutem khuret kecha asür adianutem aser kinungeri mabentsü ta tanü, Dated 8th Oct, 2025 anogo nung iba osang kaket ajanga sangdonger.

Sd/-
Takutemjen Aier
Dimapur

Sd/-
Taliyanger Aier
Dimapur



October 07, 2025 nü Indian Ocean nung United Kingdom' indang Carrier Strike Group (CSG) nungi navy aser Indian Carrier Group nati Exercise Konkan 2025 agidang tangokba noksa nung angur.



TIR YIMYIM YIMOBILEM (EDITRIAL)

DIMAPUR WEDNESDAY, OCTOBER (MONGPUTENI) 08, 2025

Tsüngremi kanga yariogo

Tir Yimyim anogo shi adok osangkaket adoker tanü küm 22 abensar saka yashiang tenzük ama bilemer aser küm 22 tsüngdaji kecha balaka tajungba küma adokba takok osangbo lemsateptsü mali, saka tepelatsü osang kaji tetenzük dangbo hopta nung anogo trok dang adoka tenzük, saka adoka - adoka nübortemi jangrabangraa azüngba ngur, kenüa methitemi züngdaktsütsü asoshi hopta nung anogo tenetnü prongla adok mapa ya asütsü. Iba jagi Tir Yimyim ya Nagaland nung Naga nunger tetsü oshi nung hopta nung anogo tenetnüprongla adokba mezüng osang kaket dang masü saka tang tashibo iba osangkaket ya dang lir. Iba takokji dang masü saka taoba küm 22 nung Tsüngrem taochi agi kenü danga osang kaket madok mesüdang adoka arutetbaji onok sasa agi masü saka Tsüngrem teyari ajanga lir. Atangji, joko alima nung kaket azüngba putu to süitemer amai, asenok rongnunga kaket azünger mali kümogo, iba jagi taoba küm 22 tsüngda nung osangkaket azünger teimba akümer masü saka ishinba küma aoer. Iba jagi tanga osangkaket karbo anenogo. Ajisüaka, tanü electronic aser digital putu nunga tanur tain ajaki computer aser mobile nung dang züngtepyonga, shirnoki kaket azünger parnok jagiang alimabo anitsü, kechiyong parnokjisa tashitemetetba aser shisa takaba akümtsü. Tapu aika jembiyonga computer aser mobile screen nung osangtsüsang aser kakettek azüngbaji, chi melenä süngo ajemer amai dang asütsü, iba jagi tebok masüngtsü, anungji tagitsü mapa tulubo meinyaktettsü. Ibaji meteta tsüraburtemia akhi kaket azüngba sobaliba to meyipa bener arua benshitsüla aser tanurtem nem parnok tila asüdangyongi kaket azüngtsü yimya sübadaktsütsüla. Ano tongtiibang kaji, asenok ajaki tetsü oshi mesamadaktsüi wazüka ayutsü indang jembir, ajisüaka kidanga pei tetsü oshi mejembir aser pei tetsü oshi nung adokba osangkaket aser tanga kaketema mazünger. Aji oda, tetsü oshi aser asen sobalibatem yabo mejembira aser mebenshira wazüka ayutsü makoktsü. Asenoki pei tetsü oshi agi züluba kakettek kaketnang sünga bendena yuaka, itemji mezüngra pei oshi nung züluba kakettekji jenjang maketba takidak makaba oset ka dang kumadoktsü. Kasaji, asenok tsürabur sobaliba aben süoshi ki sünga bendena ayuyonga, asenoki asen sobaliba mebenshitetra, aji sobaliba wazüka ayuba mapa ka masü. Pei kin aser kidong sobaliba süoshibo agi saka pei tetsü oshia memetet, kidonga mejangja aser pi den lia aotsü sobaliba awashi kenyongi memetet ta süra, pa mesüra laji shibaa ta ashitsü ? Iba amaji asen kin aser nübortem mekümdaktsünüba agi Tir Yimyim osang kaket ya adok tenzük. Ibaibo senotsü ajangzüksü merangba mapa ka masü saka pei oshi renlokda kaji pei nübortem ajangzüksütsü bilema tenzükba sabang ka lir. Atangji, nisung aikati kanga jangrabangraa azünger aser aiben onok inyaktertemi ojang tai, ozübo memetong aser mejangja ser mashimashi ka renemer agütsüypnga aremzüka azüngba onoki meteter aser aikati mapang aben ajungshiba atema pelar. Ano, tepelatsü kaji nisung aikati Olemsabang nung onük balala tazüngertem den lemsatepba ya asütsü. Alima nung kin ka aser lokti ka aienbaji yimkong sabang nung ken o tajung tamajung ajak tokzüka shisalemsatepba nungi tenzüker. Aji oda, nisung ka dak tebilemba tajung aser nübortem asoshi inyaktsütsü shisa tajung aika liaka, nübortemi mangatetra, item shisatsü aser sentong tajungji magizükteter, anungji temoatsü agi tebilemtsü akümer. Iba amaji mataloktsü atema osang kaket ajanga lemsateptsü maongka agütsür. Alima nung oshi aika liaka, pei tetsü oshiji dang pei meyong asütsü. Aji oda, pei tetsü oshi amadoker pi bendanger oshi dang jembia alibaji pi sü endoker tangar sü abener jajar amai bilemtsüla. Tir Yimyim ajanga asen nübortem nem angatetdaktsünübaji itemji lir. Iba tangatetba nung, onok dak mekokmien aika liaka, tazüngertemi onok metoktsüi nungitba asoshi pelar. Tang nungi ano tashi itshir onoki tajungba nung intsü merangtsü, kechiyong iba osangkaket ya onok meyong masü asen kin meyong kümogo. Ya asenok ajak asoshi Tsüngremi moatsüba sabang ka lir. Iba tashi nung küm 22 jajaogo, ano tanü nungi küm 23 bubai ayaokdang, ano tazüngertemi maneni nungitangma aser Tsüngremia yariangma !

OLEMSABANG

TIA MAKA

~ Rev. Imly Jamir

(Iba ya DABA Tongtepratep Adok 156, January - July 2024 nung adokba ocet tazüngertem ajangzüksütsü bilema adoktsür).

Iba alima nung meimchirtemi taküm liyonga aodang taküm tia balala ajurur. Kasa meimchir dang sür nung karbo taküm nung anisüngzük tepela agi kanga anünga dang ayah! ni yaa kechiba iba alima nung aso aka ya ta mepelai dang aliba purtem aika dang lir. Ano karbo taküm nung temoatsü aser tepela nung mapang aser anogotem süidaktsüba taküm aika lir. Saka asenok iba alima nung tia tamajung nung aliba mesüra tia tajung nung jangratema alibaji tongtibang masü, saka meimchir ka asoshi iba alima nung jangratema aliba mesüra mejungi alibaji tatembang masü. Asenok meimchir asoshiiba iba lima ajanger kelenang shitakba teti tatem makaba takümjibo anünga lir. Aser iba teti tatem makaba takümjibo asenoki iba alima nung alidang asenoki koma litet iba nungji amendaker Tsüngremi o bendang agütsütsü. Ibajibo asenok shingaia melenshitsü makoktsü. Iba akümüli nung Tsüngremer taochi asenok den alidang iba ya mapang tajunga ta mangatetra iba lima nunga mapang tajungji süitemadoktsü. Yamaji iba alima nung tamanger tajung aika lia lia pei mulungba lenmangi meyipa oadokbapur aika lia aodang Tatishitsü agi, Saul chuba ama Samson ama aser Tasen Lai tendak Yihuda Iskariot ama ano aika dang lir. Parnoki kanga meranga Tsüngrem tenzüka arur pei lenmangi meyipa oadok. Saka tatem nung parnok temulung meyipa arudang parnok asoshi menuadoker liasü.

Ni yangi ni asangsang nung ajuruba nisung ka indang mashi dang tangar aika liaka Saul chuba indang ojang ishika tamasa lemsatepdi. Saul chuba ya Benjamin kidong nungi Kisher chir liasü. Pa ya takar kibong ka nungi asojen aser tebur tajung aser tashi tait liasü, saka chuba asütsüsa qualification-bo kechia mali asü. Kenü par kidang aliba gado asem sama, anungji tebu tesamaba gado bushitsü atema kilir ka anir saulji yok. Saulikilirji anir anogo asem tashi gadoji bushia senzü dang Tsüngrem nisung Samuel ajuruba Laishiba otsü nungji asenoki angutsü. Samueli Saul majurudang Tsüngremi Samuel dang Kisher chir Saul nai ajurutsü paji Israel madak mezüngbuba Chuba asütsü nai mesüja shimtetang ta shiadoker liasü. Anungji tena kodang ajurutepe iba mapang Samueli Saul ya Israel madak mezüngbuba chuba asütsü mesüja shimtet. Aser yamaji Saul ya Israel madak chuba akum. Pa chuba kümer lia aodang pai Tsüngrem den tesendaktep yur lia aru, saka lia lia pai pa jenjang ulua tajungba küma aodang pai Tsüngrem toktsür pa lenmangi meyipa oadok aser pai mulungba ama dang lia yimsü asütsü tenzük. Anungji Tsüngremi tanemi pa toktsür oadok. Lia aodang Tsüngrem tatenba pa den malia ta meteta kümer pai temulung meyip 1 Samuel 15:30 "Idangji Sauli ashi ni temenen benshiogo, aji saka ni nü dang mepishir... kü den meyipa arungma" v35, Samueli Saul dangi pa asüba anogo matong tashi joko maru, Kibubai Saul Israel madak chuba kümdaktsüba asoshi sasaa liasü. Yamaji Sauli taküm tepiyong Tsüngrem tenzüka lia arur tatem nungbo Tsüngremer taochi mungui taküm samaadokba asenoki angur.

Ni yangi Saul chuba mesükba nisung ka taküm otsü tongmelang agi lemsatepnür. Ni Tsüngrem tenzükba wadang nung alidang kanga tesusatsü Tsüngrem tenzüker ka ajurubaji, iba tenzüker ya kibong kanga timtema aliba kibong ka nungi liasü. Lia aru dang 1977 küm revival mapang nung pa ya kanga junga melenshiba taküm ka liasü. Aser yamaji nia Tsüngrem tenzükba wadangi aiter kelen lia arudang pa den kiyong ka nung kelemi lishia ata. Pai mapang ajak nung ni nungita yaria aru aser yamaji arogo nung tenzüker tajung ka ama inyaka aru. Lia lia pa ya kanga nungtoko temezüng teshiteter ka aküm. Pai kechi shidir itemji asangsang nung ataloka aru. Anungji nüburtem teimba teimba par kidangi sempet balala bener arumeso aser talangka melii pa ya kanga takar aküm. Lia liabo iba nisung yaki sempet maben arurbo ni tangbo mapang mali, mesüra tangbo sarasadem tesü asüra ta sür meyipa yokli ta asüra ta nüburtemi kanga jembiji ni angashia künep ni tera karaa par kidang jagi ao. Iba anepdangji shitakba nung par kima nungji nisung ana noktaka liasü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Dimapur nung India Mission Summit 2025 ayongzüka agi



Dimapur, Mongputeni/October 07, 2025 (Agencies): Dimapur Ao Baptist Arogo (DABA) nung anogo pezünü tashi India Mission Summit 2025 agiba sülen October 3 nü tembangogo.

Iba senden nung India tesem balala nungi Baptist lenir 1,500 dak tali adenshia onük balala nung o lemtepbä den külemi tekülem sentong agi.

September 30 nungi tenzüka October 3 nü tashi agiba senden nung linük tesem balala nung Baptist conventions aser associations nungi lenirtem adenshia "For such a time as this: Call to Unprecedented Collaborative Global Mission" omen nung iba sentong agiogo.

Iba sentong ya India Mission Coordination Committee (IMCC)-i Nagaland Baptist Christian Convention (NBCC) den senteper ayongzüka liasü.

September 30 nü tetenzük anogo tekülem sentong nung DABA Arogo nung senior pastor, Rev. Dr. I. Wati-i lokti pelaa agizük aser IMCC Executive Director, Rev. Samaresh Nayak-i okila jembia liasü. Pai alima nung mission wadang longjemer inyaksü ayongzüka liasü.

Iba sentong International Ministries (American Baptist Churches USA) Executive Director/CEO, Rev. Sharon T. Koh-ia video conferencing ajanga alima nung Baptist Arogotemi longjemer mission wadang inyakba metetdaksü.

Iba senden nung tang India tensa nung Khristan mission mapa dak sendakba nung tayongzüka balala ajangshiba indang jembia liasü.

Evangelical Fellowship of India nung General Secretary, Rev. Vijayesh Lal-i linük aser Arogo jenjang, iba denji külemi India nung mission wadang indang metetdaksüba. Paisa alima nung mission wadang nung tayongzüka balala aser maongka balala indang jembia liasü.

O lemtepbä sentong tembanga Dr. Joshua Lorin-i India nung American Baptist missionary temi inyakba indang metetdaksü.

Anogo pezünü senden nung shilem agirtemi "Tsüngremer mapang nung," "Baptist kibong nung telongjem," "Ajakji ka

dang akümtsü," aser "Alima mission nung shilem agiba" onüktem nung Lai bushiba mapang liasü. Iba sentongji shisalen sayurtem- Rev. Peter Gangepogu, Lalhmingmawii Chongthu, Dr. Niholi Sema aser Rev. Dr. Vesekhoyi Vee Tetseo nung leniba nung agia liasü.

October 1-2 anogotem nung workshop sessions pezü agia liasü aser anogo ananüprongla nung kasa onüktem agi. Onüktem rongnung Baptist teburtem aser tetsürtem ministry, Aso 21buba nung youth ministry, tanurtem evangelization, nisung shibelenba anema inyakba, Hindutva tesayuba angatetba, lenla ajak nung mission aser leadership development densema liasü.

October 2 nikongdang sentong nung Nagaland Chief Minister Dr. Neiphiu Rio-a aden. Pai India nung tekülem kitem anema inyakba tatalokbatem liaka Arogoi maneni shisaliok, healthcare aser yimjung atema shilem tajung agiba metetdaksü.

"Maneni tamang aser

tesangwa milen asütsü aser pei lima nung dang masü saka bendanglena osangtajung proktsü atema sarasademer," ta Chief Minister-i ashi.

Kasa sentong nung Manipur, Arunachal Pradesh, Mizoram, Karnataka, Telangana aser Nagaland Baptist associations nungi choir temi ken ajanga shilem agi.

October 3 nikongdang temeja sobaliba sentong ka agia liasü.

Hokolbarnü tatembangbuba sentong nung iba senden nung renemba bangzüng sangdonga liasü, iba sülen NBCC General Secretary, Rev. Dr. Mar Pongener-i "Mangdang tasen yur inyakba" onük jembia liasü.

Wanne G. Momin-i tepela anküp o jembi aser Centenary Baptist Church, Hanamkonda nungi Rev. Dr. Nirajan Babu-i sentong tembanga sarasadem.

Iba senden nung Baptist Union of Great Britain, North East Christian University aser India tesem balala nungi Baptist conventions-i salem osang lemsatapa liasü.

ANOGO ABEN TSÜNGREM DEN

Tepela Aluruba

T. Ken 126: 1-6.

Iba ken ya 2 chubatem 19 aser Isaia 37 nung Tsüngremi kechi inyak iba nungi agiteta zülü, kodang Hezekia, Yihuda nung chuba alidang Sennacharib aser Assyria armyi Yirusalem lungpang, Yihuda nung chiyongtsü asoshi kümzüksü nüngdaka liasü, kechiaser tsükchirtemi leman ajak nokdang Yihuda nung chiyongtsü mengui liasü. Parnok alu rui aotsü mokoki liasü. Tsük senti liasü. Nüburtem kümzüker külen kodang parnok alui ao, parnoki telemtetba ka agi. Parnoki tsükji pei tanurtem atema amshitsü asü, mesüra proktsü? Aluyimertemi ajep kechiaser parnok tsük ali nung proktsü aküm(t.6). asenok ajak metsü proker aser tarurtem lir.


Tepela aluruba akatsü asoshi asenoki kechi inyaksüla? Mezüngbuba, osangtajung metsüji prokang. Laishiba nung kuli asüba noksa aika lir (2 Kor.5:20; Zek.3:2; Matt. 4:19; 5:14). Osangtajung agi nüburtem atongbaji alu ayimba mesüka lir. Iba nung amalitep nungdaker, Kechiaser kari proker aser kari arur. Na aluruba nung shilem ka asü ?

Aluruba asoshi nai sarasademang. Kümzüka malir asoshi na tanü ajeptsü akok, saka kenü na pelatsü (Gal.6:9). Shirnoki osangtajung proker parnok tepela alururtem asütsü. Tanabuba, ne rongsen Tsüngrem sentsüwangshi asoshi prokang. Asenoki prokba asenoki arutsü(2Kor 9:6-11). Nisung aikati tamagitsü nung pei rongsen lalur. Missionarytemi teyari atar, arogo ulushitsü arogoi teyari atar. Asenoki mokuri prokra asenok tepela alururtem asütsü ta Pauli ashi.

Tesembuba, Tsüngrem Tanela Temeshi prokang (Gal 6:6-8; 5:16-23). Asenoki ya koda inyaksü? Asenoki Tanela mapatemji asen mulungjang nung ayutsüla. Kodang asenoki Tsüngrem o nung shisadangdir (T.ken 119:11), asenoki Tanela aluruba arutsü. Temulungjangji atsüki ka mesüka lir, anungji asenoki aji repringtsüla. Aji temulung meyipba. Temeshi alitsü mapang agiang, sarasademang, o nung shisadangang aser metsüji ne mulung nung remang.

Tanü nai inyakba ajakji aremer; metsü tajung arutsü jangjaang.

UN-i Khristantem reshikangshiba mangu ama yutsür: Paul Richard



October 07, 2025: Alima tesem balala nung Khristantem reshikangshir, ajisüaka linüktem aser International tentetemi iba tebilemtsü maneni sendoker, ta Vatican nung tongti ketdangser, Archbishop Paul Richard Gallagher-i metetdaksü.

Alima tesem balala nung Khristantemi reshikangshi ajangshir, ajisüaka United Nations aser züngsem linüktemi iba tebilemtsü onük atema meinyaker, ta pai metetdaksü.

Taoba hopta UN General Assembly nung jembidang Vatican nung Relations with states secretary, Paul Richard Gallagher-i, alima nung Khristan million 360 bo reshikangshiba tesemtem nung alir; parnoki reshikangshi ajangshir, ta metetdakja liasü.

Paisa, tesüiba küm ishika tsüngda Khristantem reshikangshiba, Tenla kitem raksatsüba, tepuokdak ayuba aser kangshia meindokba kanga

bulua kümogo, ta metetdaksü.

"Alima nung reshikangshi tamajungba ajangshiba yimsü telokji Khristantem lir. Ajisüaka alima linüktemi ibaji mangu ama toktsür," ta pai metetdaksü.

Khristantem reshikangshiba ya yimjung atema amokmeren tamajungba lir, ta pai ashi.

Gallagher-i, Khristantem reshikangshiba ya tulubaka alima nung reju balalai yimsü temeden magütsütetba kuli ajanga lir, ta ashi.

Nija aser telok balalai sadoksadoka peii melungba yimsü benshitettsü atema parnok nem tamangba yimsü temeden agütsütsüla, ta pai ashi.

Paisa, tebok nung lia tanur raksaa indokba aser shirangertem südaksüba ya 'tepsetba sobaliba' lir, anungji linüktemi taküm alitsü temeden agütsütsü atema inyaksüla, kechiyong temeden ajak rongnungi taküm alitsü temeden ya tongtibangba, ta ashi.

Paisa, alima nung Khristantem reshikangshiba tebilemtsü anema meinyaker; meimchir temeden dang nungibo rongsen aser yimtenren

tongtibangba kümduksüogo, ta ashi. Paisa kanga sensaker linüktem dang sentsüh atoktsüla, ta ashi.

Gallagher-i Ukraine, Democratic Republic of Congo aser Syria densema alima tesem balala nung meimchir jenti tepsetba metetdaksü.

Paisa, Pope Leo XIV-i Ukraine nung tangsa rara anentsü atema tayongzüka agütsüogo aser International ozüng alema inyakba aitsüogo, ta metetdaksü.

Alima nung tashi amshiba yimtenren mesüra sepaitem ajanga yimjung mangutsü, anungji linüktemi ken o jembiba, meraraba aser terenlok ajanga yimjung alitsü asoshi inyaksüla, ta Gallagher-isa ayongzüka.

Paisa, alima nung sepaitem aser rara nung indokba senotsüji sensak tia samatsütsü aser climate change anema inyakba nung indoktsü ayongzüka.

Gallagher-i UN dang, Khristantem reshikangshiba aser meimchir temeden anema inyakba anema ola madokbaji ozüng alema inyaksü ajungshiba den kasa lir, ta ashi.

AO OSHI ANGAZÜKDAK:**TANÜ ANGAZÜKTSÜBA OJANG****Tinujungshi**

(n) kidong tsungda jungtepa aliba (relationship building amongst same clan)

* Aor loktiliba nung tinujungshi ya sobaliba tajung ka lir.

Tip

(adj) külen tsütsü, sayiplen (other side)

* Onoki ayong tip külen nungi ango aputsü tenzük.



Tir Yimyim

OLONG PAITEP # 7293

1		2				3		4		5
				6						
	7		8							
9					10			11	12	
			13			14	15			
16					17			18		
			19		20					
21		22								23
24										

TIPIEN

1. Saku - (4)
6. Songjen - (7)
7. Mali/Tazung - (4)
9. Tasen apok - (6)
11. Songtem - (3)
13. Ata liasü - (5)
16. Tzünglu den külemi tsüker - (3)
17. Aso tila - (6)
20. Tashi maküm - (4)
24. Tenüng kasa jatapba - (7)
25. Ki yangluba oset - (4)

LANGTSÜNGLEN

1. Taksep - (3)
2. Langtem - (5)
3. O tamendaktak - (4)
4. Nütsü tebuba - (3)
5. Anüngdang tesangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. --- tatsü - (3)
12. Tebur kidong aser zünga kasa tsüngda jatapba - (4)
14. Pela agizükba tapu ka - (5)
15. Tenüng atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 7292 TELANGZÜBA**TIPIEN :**

2. Pongsen, 5. Lepko, 7. Omen,
8. Maongka, 10. Yangkhu,
12. Senpong, 14. Angu, 15. Raksa,
16. Arameso

LANGTSÜNGLEN :

1. Alimang, 2. Pongen, 3. Samaru,
4. Nün, 6. Pio, 9. Nüngdak,
10. Yongya, 11. Kongro, 13. Ora,
14. Ata.

NAI-A YA METETTER

Scissors ya pai yanglutet ta meshitetsü, saka design ya küm aika yanglushia aru aser spring scissors ya Egypt (1500 BCE) aser pivoted scissor ya Rome nung 100AD meta amshiba ngutetogo. Scissors ya Leonardo da Vinci-i yanglutet ta ashiba ya tai lir. Modern, mass-produced steel scissor tem ya Robert Hinchliffe-i 1761 küm England nung yanglua liasü.

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimym@gmail.com nung yokang mesüra Tir Yimyim bureau tem nung agüjang.

Mizo nunger temeden kümzüka ayutsü atema MNF meyipa arutsü: Zoramthanga

Aizawl, Mongputeni/ October 7 (Agencies): Taoba Mizoram Chief Minister aser Mizo National Front (MNF) tir Zoramthanga-i October 6, Mizo nunger aser Mizoram tejangraba kümzüka ayutsü atema par party 2028 Assembly election nung meyipa arua sorkar kümtetsü, ta ashi.

Pai, Forest (Conservation) Amendment Act (FCAA), 2023 adopt asüba atema Zoram People's Movement (ZPM) sorkar aitsü. Iba jenjang agiba ajanga lisopurtem ali temeden lendongbang nung toktsür ta pai ashi.

Aizawl kübok MNF office nung party worker tem den jembiba mapang Zoramthanga-i, Centre indang legislation puküma nüburtem ashioksüba atema ZPM administration aija liasü.

Pai ashiba agi, MNF-i iba Act ya Mizoram nung benoka anemer aser iba ya benoka minyadaksütsü atema takokba tashi nokdaksü tenangzükba agütsü.

Zoramthanga-isa, forest



Taoba Mizoram Chief Minister aser Mizo National Front (MNF) tir Zoramthanga

clearance jelia magi iba ya puküma nokdaker, ta international arrtsü nungi Zoramthanga-i ashi.

"Mizo nunger temeden kümzüka ayutsü atema MNF tashi dangi arutsü aser onoki FCAA ya maneni anemtsü," ta pai sangdong.

Zoramthanga-i, iba Act ya

Constitution nung Article 371G anema lir, koba ajanga Mizoram nem tekümzüka balaka agütsür, ta ashi.

Pai, iba provision ya Mizo nunger ali asoshi amokmeren ka lir, ta shia tekümdangtsü metetdaksü.

Paisa, MNF-i anir sorkar kümteter aliba mapang FCAA magizüktsü atema Mizoram Assembly nung bangzüng ka agizüka liasü ta ashi.

Ajisüaka tang ZPM sorkari

ta ashi.

Sosthenes-i Assam den arrtsü ken o takaraba nung bentetsü mepeshi

Shillong, Mongputeni/ October 7 (Agencies): Meghalaya Cabinet Minister Sosthenes Sohtun-i, Assam den arrtsü atema sensaksem tanabuba shilem takaratiba nung agiyonga aotsü ayongzükogo.

Arrtsü ken o indang jembiba mapang Sohtun, shiba iba sensaksem achaayangba regional committee nung züngsem ka lir, pai arrtsü nung mangatetep adoker aliba tesem nung alirtem anisüngzükdaksütsü atema ken o mebenteti aliba bentetsü koda tongtibang iba indang lemsatetep.

"Onok dang sensaksem tanabuba shilem nung lir. Arrtsü nung alirtem tebilemstü

bentetsütsü atema sensaksem takaratiba nung agitsü nüngdakba regional committee mendenbuba den jembio," ta Sohtun-i ashi.

Assam aser Meghalaya na ya joko mapang talangka tesem 12 nung ali raktepa arudar.

2022 küm March ita Memorandum of Understanding (MoU) ka nung sign asüba sülen tesem trok nungbo ken o bentetogo.

Tang sensaksema aliba ya Langpith, Borduar, Deshdoomreah, Block I and II, Psiar-Khanduli, aser Nongwah-Mawtamur ta tesem trok nung mangatetep aliba bentetsü atema inyaktepdar.

June ita Chief Ministers

timtemtepa arudar.

Dampa Assembly bypoll Nov 11 nü agitsü

Aizawl, Mongputeni/ October 7 (Agencies): North-western Mizoram kübok Mamit district nung Dampa Assembly menden atema by-election November 11 nü agitsü.

Election Commission-i Hobarnü sangdong ka ajanga, Dampa bypoll ya Jharkhand, Punjab, Telangana nung by-election aser Bihar Assembly election tanabuba shilem den külemi agitsü, ta metetdaksüogo.

Iba election atema nomination file asütsü asoshi tatembangbuba anogoji October 21 asütsü aser candidate temi parnok indang nominations ya October 24 nü tashi nung agintetsü. Nomination paper tem October

22 nü asadangtsü.

Maneni Election Commission-i, Bihar Assembly elections aser Mizoram nung Dampa constituency densema state balala nung bypolls vote ya November 14 nü azüngtsü lateta yuogo.

Mizo National Front (MNF) legislator Lalrintluanga Sailo June 21 nü asüba sülen Dampa nung bypoll agitsü nüngdaka kümogo.

Ruling Zoram People's Movement (ZPM)-i Mizo nunger kenteter aser sayutsüngir Vanlalsailova nominate süogo aser opposition tongtiba MNF-i parnok indang vice president aser taoba health minister Dr. R. Lalthangliana shimogo.

Congress-a iba election nung tokteptsü aser parnoki party vice president aser taoba mapang minister John Rotluangaliana shimogo.

BJP-i, taoba mapang Congress lenir Lalhmangaiha shiba tawa party nung denogo, pa nominate süogo.

September 30 nü sayaba tatembangbuba electoral roll nung Dampa nung voter 20,790 lir, kong tetsür voter 10,185 densema lir.

Dampa constituency nung polling stations 41 lir. Polling station tem rongnung Silsury-I polling station nung voter (1,103) timba lir aser Zopui polling station nung voter (30) ishiba lir, ta Election Department-i metetdaksüogo.

John Clarke, Michel Devoret aser John Martins nem Nobel Prize in Physics agütsür

Stockholm, Mongputeni/ Oct. 07 (Agencies): John Clarke, Michel H. Devoret aser John M. Martinis nungeri "electric circuit nung microscopic quantum mechanical tunnelling aser energy quantisation" ngutetba atema Nobel Prize in Physics 2025 agütsür, ta Royal Swedish Academy of Sciences ajanga Stockholm nungi sangdong.

Chair of the Nobel Committee for Physics, Olle Eriksson-i ashiba agi, "Küm noklang ka tain quantum mechanics ajanga maneni tesüngmangtsü tasen agütsüba benjongtetba ya jangratemtsüka lir. Ibai kangasa nüngdaker, kechiaser digital technology ajunga tamendak dakji quantum mechanics ya lir."

Quantum technology agi asen meketa aliba tatishitsü kaji computer microchips nung transistors ya lir. Taküm Nobel Prize in Physics ajanga 'quantum cryptography,

quantum computers aser quantum sensors' densema "next generation quantum technology" yanglutsü asoshi maongka agütsü, ta committee ajanga ashi.

Yimya agi quantum effects ya atomic level nung dang reprangteter, saka parnoki bushitetba ajanga 'large-scale systems' nunga sayuteter. Iba ya bushitetba ajanga quantum computing aser quantum devices tasen yangluba nung lenmang tesadem lapoktsür, koba ajanga information processing aser security tajungba kuma melenshitsür.

Iba sempet nungya sen 11 million Swedish kronor (India nunger sen 1.03 crore shi) lir aser iba ya December 10 nü Stockholm nung sentong ka agidang agütsütsü.

Taküm Nobel Prize ya Hombarnü (October 6, 2025) nungi sangdong tenzüokogo aser Physiology mesüra Medicine indang sempet ya Mary E.

Brunkow, Fred Ramsdell aser Shimon Sakaguchi nunger nem immune system indang "security guards" regulatory T cells bushitetba atema agütsü. Chemistry, Literature, Peace aser Economic Sciences atema takok angurtem ya October 8, 9, 10 aser 13 anogotem sangdongtsü.

2024 küm Physics Nobel ya John J. Hopfield aser Geoffrey Hinton nem agütsü, shirnoki artificial neural networks ajanga machine-i angazükba indang tamendak dak bushitet.

2023 küm iba sempet ya Pierre Agostini, Ferenc Krausz aser Anne L'Huillier nunger nem agüja liasü.

John Clarke ya University of California, Berkeley, USA nung experimental physicist lir, Michel H. Devoret ya Yale University, New Haven, CT, USA nung Professor inyaker aser John M. Martinis ya University of California, Santa Barbara, USA nung Professor lir.

Tashi tulu linük temia tembar nüngdaker: Israel PM Netanyahu



Jerusalem, Mongputeni/ Oct. 07 (Agencies): Tensa kanga kera melenshia aoba lima ka nung tashi tait linük tema kisüng menokdaktetsü, aser "superpowers" temia tembar nüngdaker aser Iran indang nuclear mangdang ama arok timtem koktettsü asoshi nokdakba nung Israel ya tongtipang lir, ta Israel Ato Kilonser Benjamin Netanyahu-i ashi.

Osangbener den jembidang, tashi tulutiba linükia security, technological advancement aser itdangiterba lemsatepba nung alliances dak metaloka alir, ta Netanyahu-i ashi. "America First ta asüba tetetzü America kisüng ta ashir masü, kechiaser linük ajungai tembar nüngdaker. Superpowers temia allies nüngdaker. China-a allies lir. Russia-a allies lir," ta pai ashi.

Netanyahu-i iba o ya October 7 nü ashi, koba Hamas-i Israel maker küm ana shidak alitsü.

Pai Israel ya pei tebilemtsü khuret bener raraba tembar linük ka lir aser küm aika bendanger sepai teyari magie pei sasa pei kumzüka ayuba linük ka lir, ta pai ashi.

"Onoki America nunger dang tsüngsem bener arutsütsü masüngdang. Tesüiba küm 77 tashi onok sasa onok kumzüka arur," ta Netanyahu-i ashi.

Iran dak tejak meyiplokja, Tehran-i nuclear warheads abentsü akokba intercontinental ballistic missiles yanglutsü merangba ya United States asoshi tebilemtsü lir, ta Israel leniri ashi.

"Tang Iran-i meta 8,000 kilometer otettsüba ballistic missiles yanglur. Yangji

kilometer 3,000 bendenlokra, New York City, Washington, Boston, Miami, Mar-a-Lago ta par atomic guns kübok lir," ta pai tekumdangtsü ashi.

Region nung rara tuluba madokdaksüi Iran indang nuclear mangdang azüoktsü asoshi tasü ita aser kanga kumdanga mera agiba atema Netanyahu-i US Tir Donald Trump nem tenüngsang agütsü.

"Nüngdakba ama onok tembar linük shidak lir, kong anibelem lemsateper, aser Iran tashi mait kumdaksü, koba ajanga America nunger yimti ajunga yoka achitsü liasü," ta pai ashi.

Iran indang nuclear tashi renloka aoba aser US-i Tehran indang nok-nü sentong azüoktsü merangba mechi Middle East nung tensa tamajung asendenshiba mapang ka nung Israel indang ato kilonseri iba o ya ashi.



7 BUBA LAO RIJU

ARANGTET TATIDANG (AT) TAKOKER
KULIKAKET AGÜTSÜBA SENTONG



ANOGO : MONGPUTENI 11, 2025
MAPANG : 10 AKO NUNGI
Tesentepdak : Aor Kilem (Conference Hall)

O Jembir:
Wb. Rev. Tamsü Jamir
Executive Secretary, ABAM, Impur



SENTONG TARENSEN

- | | |
|--|--|
| 1. Menden | : Kr. Repabenla
Asst. Professor, FAC. Mkg |
| 2. Sarasademsü | : Wb. S. Daniel Ao
Pastor, Nagaland Christian Revival Church, Mkg |
| 3. Sentong okila | : Wb. I. Meyionen Jamir
Chief Information Commissioner (Rtd.), Nagaland |
| 4. Temeja ken | : FAC Kaketshir, (Ao Honours) |
| 5. O jembitsü | : Wb. Rev. Tamsü Jamir |
| Onük : "Sobaliba Tamentakdakji Pei Oshi" | |
| 6. Ao Senden Züngküm o | : Wb. Imtipokym
General Secretary, Ao Senden |
| 7. Arangtet Takoker nungi | : Wb. Longrilemba, Ungma |
| 8. Kulikaket agütsütsü | : Rev. Prof. Rongsen
Mendenbuba, Ao Riju |
| 9. Oktem | : Wb. I. Temjen Tzüdir
P/H & Co-ordinator |
| 10. Tatem Sarasadem | : Rev. Puryapang, Pastor
Yimyu Baptist Arogo |

TEMETETTSÜ :

- Arangtet Tatidang ACT, ADT aser PGDT. Luroi 2022 nungi Rongjui 2025 tashi nung Dissertation (PGDT) temer alirtem ajak iba sentong nung kuli süa arua takoker Kulikaket (Certificate) agizüktsüla.
- Iba sentong nung Ao Riju Luden, Ao Senden Tongror Luden, Watsü Mungdang aser AKM Ketdangpur ajak Mokokchung Town telungtet nung College-tem, Higher Secondary Schools aser High School (Govt. & Private) ajak nungi Ao tesayurtem arua adentsü jaoker.
- Arangtet Tenren balala (ACT, ADT, PGDT) nung takok ngur alirtem (Graduating Students) aser Ao Riju Sanen Luden züngsem ajak iba anepdang 9 ako nungbo arua terenemshiba (Rehearsal) sentong nung adentsüla.

MOLUNGNEN O

15.01.1952 - 01.10.2025

Onoki teti meima aliba Asür **Ajungla Walling** la shirang yipden nung aliba mapang nungi akümüli wadang tempanga aruba anogo tashi kija, kibong aser lokti shirmokisa nübu, rongsen, shisatsü aser sarasadem agi yaritepogo, nenok ajak dang tebang agi meshitetba tepela iba sangdong ajanga lemsateper.

Nenok mapa tajung asoshi Tsüngremi maneni moajangma.

~ **Temeim Kinungbo, Jabaso, Semchirtem aser Kinungertem.**



NSF MM Trophy: Sechü Zubza aser Red Scars na QF-i iogo



Kohima, Mongputeni/October 7 (TYO): Toba mapang champion Red Scars Football Club aser champions Sechü Zubza Football Club nati Mongolbarnü pei tata asaya koka quarter-finals tongtetogo. 25buba NSF Martyrs' Memorial Trophy ya tang Indira Gandhi Stadium, Kohima nung asayadar.

Tasembuba pre-quarterfinal asaya nung 2023 champions Red Scars FC-i goal 5-0 agi Michazou FC koka liasü. Asaya nung Red Scars atema mezüngbuba goal ya Asito (8)-i minute 5buba nung idaktsü aser paisa, minute 23buba nung tanabuba goal idakja liasü. Iba sülen Rakeviche (10)-i minute 26buba nung tasembuba goal

idaktsü.

Maneni asaya tanabuba shilem nung Sentisang-i par team atema minute 63 aser 71buba nung goal ana idakja parnoki asaya akok.

Iba asaya atema Asito nem Player of the Match naroküm taoba mapang Angami Students' Union Vice President Kevilehou Zumvü-i agütsü.

Nagashe Swu, Executive Engineer, Tribal Affairs Department (Housing) match patron liasü.

Bodhbarnü tanabuba asaya nung defending champions Sechü Zubza FC-i tie-breaker asayaba sülen goal 3-1 agi Ward 19 Kohima kokogo. Goal kaka danga magütsüi asaya tembangba sülen penalty

metsütepa liasü.

Penalty metsütepa mapang Sechü Zubza skipper Neithovilie Chalieu-i ball asem tashi nokdang aser kasa mapang nung par teammate temi aibelen mesüi goal idakja parnoki asaya akok.

Iba asaya atema Chalieu nem Player of the Match naroküm agütsü. Iba naroküm ya Deputy Director of Rural Development T. Phangphe Wangsha-i agütsü, shiba match patron liasü.

Tanü asaya akokba sülen Sechü Zubza FC aser Red Scars FC n October 11 nü quarter-final asayatsü.

October 8 nü asaya:

1. New Market FC vs Mao Students' Union @ 12Noon
2. Nagaland United SC vs Dimapur Chaos @ 2pm.

India den asayamung atema Australia squad sangdongogo

Mongputeni/October 7, 2025 (Agencies): India den taruba white-ball asayamung atema Australia team shimertemi squad sangdongogo. Team nung Mitchell Starc densema lir aser uncapped batter Matthew Renshaw-a ODI squad nung züngoksemogo.

October 19 nungi tenzüka ODI asayamung aser iba sülen T20I asaya ana atema squad ya Mongolbarnü sangdongogo.

Starc, shiba tawa T20 internationals asaya nungi anenogo, pa August ita South Africa den asayamung nung masayaba sülen maneni squad nung denogo. Ashes atongtsü lia pa anisüngzükdaktsütsü asoshi West Indies den Test asayaba sülen masaydaktsüi arudar.

ODI squad nung asayar 15 rongnung Starc den Renshaw, Matt Short, aser Mitch Owen

nata densema lir. Owen aser Short naprongla South Africa den asayamung atema shim, saka yiruba ajanga masayateti liasü.

Domestic 50-over cricket nung kanga junga asayaba sülen Owen aser Renshaw na India den ODI nung mezüngbuba asayatsü lir.

Steve Smith, Glenn Maxwell, aser Marcus Stoinis nunger ODI asaya nungi anenba sülen 2027 küm World Cup masaya tsüngda Australia tang ODI team yanglushiba mapang ka lir.

Kasa mapang nung South Africa den asaya nung innings anaprongla nung run kaka dang yangluba sülen Marnus Labuschagne bo meshim.

Pat Cummins yirur aliba mapang Mitchell Marsh maneni ODI captain asütsü. Alex Carey Perth nung mezüngbuba ODI asaya nung masayatettsü. Pa

South Australia indang Sheffield Shield match nung asayatsü.

India den ODI asayamung ya Perth nung October 19 nü mezüngbuba asayatsü aser iba sülen Adelaide aser Sydney na nung asayatsü. Maneni T20I asaya pongu ya October 29 nü Canberra nung tenzüksü. Manuka Oval nung mezüngbuba T20 asaya ana aser MCG nung asaya atema ticket yokmatokogo.

Australia ODI Squad: Mitchell Marsh (c), Xavier Bartlett, Alex Carey, Cooper Connolly, Ben Dwarshuis, Nathan Ellis, Cameron Green, Josh Hazlewood, Travis Head, Josh Inglis, Mitchell Owen, Matthew Renshaw, Matthew Short, Mitchell Starc, Adam Zampa.

Australia T20I squad (mezüngbuba asaya ana): Mitchell Marsh (c), Sean Abbott, Xavier Bartlett, Tim David, Ben Dwarshuis, Nathan Ellis, Josh Hazlewood, Travis Head, Josh Inglis, Matthew Kuhnemann, Mitchell Owen, Matthew Short, Marcus Stoinis, Adam Zampa.

Australia vs India ODIs 2025

October 19: First ODI v India, Perth Stadium, Perth

October 23: Second ODI v India, Adelaide Oval, Adelaide

October 25: Third ODI v India, SCG, Sydney

Australia vs India T20Is 2025

October 29: First T20I v India, Manuka Oval, Canberra

October 31: Second T20I v India, MCG, Melbourne

November 2: Third T20I v India, Bellerive Oval, Hobart

November 6: Fourth T20I v India, Gold Coast Stadium, Gold Coast

November 8: Fifth T20I v India, The Gabba, Brisbane.

Fabio Cannavaro Uzbekistan coach kümogo



"Italy nunger coach yagi ozü linük national team taruba World Cup atema renemshiba mapang len anitsü, koba USA, Canada, aser Mexico nung asayatsü lir.

Cannavaro tang agi tanabenbuba national team ka coach mapa inyaktsü lir. Pa taoba mapang 2019 küm China indang coach liasü, saka pa lenisüng nung asaya ana dang asaya, koba anaprongla tamakok nung tembang.

Asaya nungi anenba sülen arishi küm 50 tain taoba mapang asayar ya China, Saudi Arabia, Croatia, aser Italy nung team balala nung caoch mapa inyakogo.

Pa asoshi takok tulutibaji 2019 küm Guangzhou Evergrande pur Chinese Super League title takok dangi aniba ya asütsü. Kasa küm pa mapang tatsüka China indang national coach mapa inyak.

Coach maküm tsüngda Cannavaro ya team balala nung kanga junga asayaogo aser pa iba asaya nung ajaki kanga akümstübuba defender ka lir.

Pa Parma nung asaya tenzüka aser Juventus nung kanga nungtugu küma iba club nungi Serie A title ana tashi aben.

Iba sülen pa Real Madrid-i ao aser La Liga title ana atonga bena liasü. Pai 2006 küm Ballon d'Or dena agizükogo. Pa maneni Juventus nung mapang tatsüka asayaba sülen Dubai-i ao aser idakji career tembanga liasü.

Mongputeni/October 7, 2025 (Agencies): 2006 küm World Cup akokba Italy team captain Fabio Cannavaro Uzbekistan national football team head coach asütsü shimogo, ta linük football association-i metetdaktsü.

Central Asian nung aliba linük football asaya puti otsü nung tawa alizüng tasen ka tongteta parnok tang mezüngbuba FIFA World Cup atema qualify sür aliba mapang tang parnoki iba tasütait jenjang ya agiogo.

Instagram nung sangdong ka ajanga Uzbekistan Football Association (UFA)-i Cannavaro shimba jangjatsüogo.

"Uzbekistan Football Association-i Fabio Cannavaro den tenangzüktepba ka yangluogo. Pa ya nüngutugu specialist ka, par putu nung defender tem rongnung tajungtiba ka, World Cup nung pezüben asayar aliba asayar ka aser 2006 FIFA World Cup akokba asayar ka lir," ta UFA-i ashi.

BILEMDANGANG

"An bener aoba asoshi nai shirong nem tatok agütsüra, nü santemjia kümzüka Mali."

MDFA Fixture					
Pool A		Pool B		Pool C	Pool D
1.KSUM(Champion)		1. Telongjem FC		1.Thunder Bold FC	1.Chargers FC
2.SportsSocietySoyim		2.Super Seniors FC		2. NU, Lumami	2.Sangpang SC
3.Team Gilgal		3.Intermingle Club		3.Doyang Strikers, MKG	
LEAGUE MATCHES					
DATE	TIMING	MATCH NO.	MATCHES		
14/10/25(Tue)	2:00pm	1	KSUM Vs Sports Society Soyim		
15/10/25(Wed)	1:00pm	2	Telongjem FC Vs Super Seniors FC		
	2:30pm	3	Thunder Bold FC Vs NU, Lumami		
16/10/25(Thu)	1:00 pm	4	Chargers FC Vs Sangpang SC		
	2:30 pm	5	KSUM Vs Team Gilgal		
17/10/25(Fri)	1:00 pm	6	Telongjem FC Vs Intermingle Club		
	2:30 pm	7	Thunder Bold FC Vs Doyang Strikers, MKG		
18/10/25(Sat)	12:00pm	8	Sports Society Soyim Vs Team Gilgal		
	1:30pm	9	Super Seniors FC Vs Intermingle Club		
	3:00pm	10	NU, Lumami Vs Doyang Stikers, MKG		
19/10/25		SUNDAY			
QUARTER FINALS					
DATE	TIMING	MATCH NO.	MATCHES		
20/10/25(Mon)	12:00Noon	1 st Quarter	Winner of A Vs Runners up B		T
	2:00pm	2 nd Quarter	Winner of C Vs Runners up D		U
21/10/25(Tue)	12:00Noon	3 rd Quarter	Winner of B Vs Runners up A		V
	2:00pm	4 th Quarter	Winner of D Vs Runners up C		W
SEMIFINALS					
DATE	TIMING	MATCH NO.	MATCHES		
22/10/25(Wed)	1:00pm	1 st Semi Final	Winner of T Vs Winner of V		X
23/10/25(Thu)	1:00pm	2 nd Semi Final	Winner of U Vs Winner of W		Y
FINALS					
DATE	TIMING	MATCH NO.		MATCHES	
25/10/25(Sat)	1:00pm	Final		Winner of X Vs Winner of Y	